

Saksutgreiing:

HANDLINGSPLAN FOR VESTLANDET SITT ARBEID I NORDSJØKOMMISSJONEN 2019

Sakshandsamar: Geir Sør-Reime, Rogaland

Bakgrunn:

Vestlandsrådet ba i sak 24/16 Evaluering av Vestlandsfylkas innsats og arbeidsform i Nordsjøkommisjonen om at det vert lagt fram ein årleg handlingsplan for Vestlandsrådet sitt arbeid i Nordsjøkommisjonen.

Om arbeidet i Nordsjøkommisjonen

Arbeidet i Nordsjøkommisjonen vert styrt av strategidokumentet «North Sea Region 2020». Strategidokumentet gir argumentasjon for behovet for meir strategisk samarbeid i Nordsjøbassenget ved å definere felles utfordringar, moglegheiter og prioriterte område for samarbeid. Dei prioriterte områda er; berekraftige lokalsamfunn, klima og miljø, forvaltning av sjøareala og transport. I 2021 blir denne strategien erstatta av eit nytt strategidokument (sjå nedanfor).

Strategien vert i stor grad operasjonalisert gjennom arbeidet i dei tematiske arbeidsgruppene marine ressursar, transport, smarte regionar og energi og klima. Fleire fagfelt og tema som desse gruppene arbeider med er også aktuelle for Vestlandsrådet.

Vestlandsfylka har ulik representasjon i dei tematiske gruppene. Sekretariatet i Vestlandsrådet og dei internasjonale kontaktane i vestlandsfylka kan, i samarbeid med representantar i dei tematiske gruppene, plukke opp aktuelle saker og spele desse inn til Vestlandsrådet når dette er relevant.

I tillegg er det ei rekkje overordna tema der medlemsregionane har moglegheit til å påverke om dei har ei strategisk tilnærming. Handlingsplanen under identifiserer nokre slike overordna tema der Vestlandsrådet kan delta og påverke utviklinga.

Handlingsplan for Vestlandsrådet sitt strategiske arbeid i Nordsjøkommisjonen 2019

Følgjande handlingsplan vert foreslått for 2019:

1. Bidra til utvikling av nytt strategidokument for Nordsjøkommisjonen

Nordsjøkommisjonen har sett i verk eit omfattande arbeid med ein ny strategi for samarbeidet mellom regionane rundt Nordsjøen for perioden 2021-27. Våren 2019 arbeider ein med val av prioriterte område for samarbeidet, og generalforsamlinga juni 2019 skal vedta desse, etter innspel frå m.a. medlemsregionane, dei tematiske gruppene og aktuelle samarbeidspartar og interessentar elles. Hausten 2019 og våren 2020 utarbeider ein så det endelege strategidokumentet, som blir vedteke på generalforsamlinga 2020.

Det er viktig at Vestlandsrådet sine medlemsfylke deltek i diskusjonane om strategien, då spesielt i telefonmøte i forkant av styremøte og på delegatmøtet under Nordsjøkommisjonens årsmøte.

2. Utarbeide sams innspel til CPMR si slutterklæring på generalforsamlinga hausten 2019

På generalforsamlinga til CPMR kvar haust vert det utarbeidd ei slutterklæring som viser den ønska retninga for arbeidet i CPMR det kommande året. Dokumentet er også eit viktig lobbydokument som vert sendt direkte til dei europeiske institusjonane.

Nordsjøkommisjonen organiserer felles innspel frå medlemsregionane. Sakene som utgjør slutterklæringa vert handsama på styremøta (Political Bureau) gjennom året. Vestlandsrådet er representert ved den norske medlemen Marianne Chesak og administrativ støtte til henne. På sjølve generalforsamlinga har alle medlemsregionar møte- og talerett.

Temaet for innspelet vil avhenge av kva viktige internasjonale saker som kjem opp framover med relevans for Vestlandet.

3. Felles posisjon om Brexit

Brexit er ei viktig sak med vesentlege konsekvensar for rammevilkåra rundt Nordsjøen. I 2019 vil fokus truleg vera korleis samhandlinga mellom statane rundt Nordsjøen skal vera etter at Storbritannia har gått ut av EU, truleg 29.mars. Kor mykje partane klarer å bli samde om før dette, vil avgjera kor utfordrande tida etterpå vil bli, men Vestlandsrådet må vera budd på alle eventualitetar. Vestlandsrådet kan vinna mykje på å opptre samla overfor t.d. sentrale styremakter for å trygga arbeidsplassar og framtida til mange lokalsamfunn. Vestlandsrådets sekretariat, Marianne Chesak som Vestlandsrådets medlem i Nordsjøkommisjonens arbeidsgruppe om Brexit, og Vestlandsrådet si internasjonale gruppe vil fylgja tett utviklinga rundt Brexit.

4. Utarbeiding av sams posisjonar om norsk deltaking i Interreg og prioriteringar i programma etter 2020

I 2018 har det vore mykje diskusjon om dei framtidige Interreg-programma for perioden 2021-27, men det synest no som det er semje mellom medlemsstatane om å oppretthalda Interreg om lag som i inneverande periode. Det som framleis er ope, er geografien for programma etter 2020, og t.d. framtida til Nordsjøprogrammet, som er hovudprogrammet for aktørar i Vest-Noreg. Det er heller ikkje avgjort om Noreg blir med i eit slikt program.

Allereie no startar arbeidet med å førebu eit nytt Nordsjøprogram, og det er viktig at vestlandsfylka nyttar dei kanalane ein har til å sikra prioriteringar i programmet som sikrar interessene til dei relevante aktørarane i Vest-Noreg.

Nytt i Interreg frå 2021 blir truleg ein ny 5.komponent knytt til smart spesialisering strategiar. Det vil vera svært viktig at også norske regionar kan delta i dette arbeidet, og Vestlandsrådet må arbeida for at Noreg blir med også i denne komponenten, som kan gje dei norske regionane tilgang til nye arbeidsmetodar og nye partnerskap i det framtidige regionale utviklingsarbeidet.

Det er også viktig at Vestlandsrådet er budd på å gje reaksjonar på den utreiinga om framtidig norsk deltaking i Interreg-programma som Kommunal- og moderniseringsdepartementet har bestilt, og dei konklusjonane departementet vil trekka av denne.

Forslag til vedtak:

Vestlandsrådet godkjenner handlingsplanen for Vestlandsrådet sitt arbeid i Nordsjøkommisjonen i 2019 slik den er lagt fram.

Håkon Schwalb
kst fylkesrådmann

Arne Hope
sekretariatsleiar

Dette dokumentet er godkjent elektronisk og har derfor ingen signatur.